

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2685 del 20/09/2023

Traduzione in ladino

“Concerto Euregio Konzert”, angern tel Auditorie de Trent i joegn musizisc di trei raions

En domenia da les 5 domesdi tel auditorie S. Chiara de Trent l é stat l concert de la scoles de musega del Euregio, n event dassen aprijà dal publich, a chel che à tout pèrt i joegn musizisc di trei raions. À avert l concert la Banda Giovanile SM “A. Vivaldi” de Busan, metuda su do l event Music Camp 2022 e metuda adum da joegn anter i 12 e 17 egn, e la museghes del quartet di joegn saxofonisc JuNoMoDa4, de la Musikschule Überetsch Mittleres Etschtal, metù su del 2021 te la Scola de Musega Unterland, che l tol pèrt con bon ejit a n gran numer de concorsc, conzerc e registracions de filmac. Do da ic, à sonà l Gesangsstudio Do-RE-MI de la Landesmusikschule Telfs, olache bec e joenec anter i 5 e 15 egn empèra a sonèr, cianterà e meter en scena operes, toc de musega e spetacoi, apede ence l Accordions Ensemble, n grop de cinch sonadores de orghegn da mantech de la Scola de Musega de Primier. À serà su l concert l’Orchestra di joegn sonadores de archech del Euregio, metuda ensema da 30 arlieves de la Scoles de musega del Trentin, del Sudtirol e del Tirol, dai 11 ai 15 egn.

L event, a chel che à tout pèrt la secretèra generèla del Euregio Elisa Bertò, l é stat n moment storich per chest projet de formazion en cont a la musega de basa ti raions del Euroregion.

Con n sentiment de colaborazion sorafora la seides, defat, l Euregio met a jir desferenta scomenzadives per baratèr e tegnir su l’educasion musicala de basa anter i joegn, na formazion che revèrda soraldut la popolazion anter i 6 e i 18 egn, na età conscidrèda fondamentèla per l svelup de la consaputa musicala de vigni comunanza. Per chesta rejon l é stat portà dant de jugn a Trent, te n convegno a chel che à tout pèrt i esperc più de nonzech de la scoles de musega di trei raions del Euregio – maestres de musega, diretores de la scoles e insegnanc, estra che i diretores di conservatories, l é stat portà dant i desferenc sistemes per insegnèr la musega. L é vegnù fora che la provinzie autonome de Trent e de Busan e l Land Tirol i porta dant sistemes desferenc per la formazion musicala de basa. La Provinzia de Trent, per ejempie, la ge dèsc didament a 13 scoles de musega privates creditèdes aldò de criteries specifichs: i arlieves che tol prèt ai corsc de chesta scoles i é più che 5.000. Tel Sudtirol, alincontra, l’educasion musicala la é didèda diretamente da la provinzia, enveze la situazion tel Tirol la é amò desvaliva.

L obietif del convegno l é stat de confrontèr i desferenc sistemes de formazion per insegnèr la musega de basa ti raions del Euregio, estra che i desvalives sistemes de insegnament. Ence te chela ocasion joegn musizisc rué dai trei raions del Euregio i à podù portèr dant sia capacitèdes tras n concert duc adum a l’averta , te Piazza Dante.

Fotos del Euregio. Filmac del ofize Stampa PAT

Desèria chiò fotos e filmac: [bit.ly/48hUYX2](https://www.youtube.com/watch?v=IQOzYGcLW3E)

<https://www.youtube.com/watch?v=IQOzYGcLW3E>

Traduzion di Servijes Linguistics e Culturèi del Comun general de Fascia

(cdt)